

Factum pour monstrier

Que le Prieuré de Montereau Fault-yonne
est Prieuré simple & non conuentuel.

PRIMO, la presumption de droict est que tout
benefice cōuentuel est electif par le texte formel
*in cap. i. de electione. in cap. ij. versiculo, priores de
statu monach.* les parties sont d'accord que ledict
Prieuré est collatif, dont sensuit que par presom-
ption il est simple.

*Prieur fait conuentionuel
& electif.*

SECVNDO, il appert par le proces que cy deuant Labbé
desainct Lhomme dont depend ledit Prieuré enuoyoit audit
Prieuré des Religieux de son Abbaye, pour estre *socii* dudit
Prieur, qui est vn argumēt cōcluant que le Prieuré est simple.


CAR en vn Prieuré cōuentuel on n'enuoye iamais vn Re-
ligieux pour estre *socius* du Prieur, ains est le Religieux per-
petuel & non reuocable, cōme est le Religieux enuoyé pour
estre *socius* dudit Prieur, lequel *socius* sert au Prieur pour ay-
der à faire le seruice diuin, ou pour le diuertir de la cōpagnie
& frequentation des seculiers, ou par autres raisons contenues
audit text, *in cap. ij. de statu monach. in principio.*

*Socius du Prieur n'est qu'un
aux benefices collatifs
simples.*

LE Religieux enuoyé en vn Prieuré cōuentuel ne pourroit
estre *socius* dudit Prieur, car ledit Prieur, *dignitatem habet* par
la Clementine seconde, *de rescript. neque recipit socium*, & n'a
tel enuoy lieu, que *in beneficiis simplicibus*. suyuant le texte cy
dessus allegué, & *in cap. quod Dei timorem. de statu monachor. in
fine. Prior Prioratus Conuentualis vocatur Prælatus in. §. quanta. de
electionibus in prag. sanct. & in cap. ij. de rescript. in clement. ideo
socium aut parem non habet.*

TERTIO il appert par le bail fait du reuenu dudit Prieuré
par le dernier titulaire & possesseur qu'il y a vn seul Cordelier
audit Prieuré qui fait le seruice diuin auquel le fermier est
obligé de payer *certum quid*, sans qu'il soit tenu de nourrir au-
tre Religieux, vn ny plusieurs.

A



Nasquis de la
communauté.

QUARTO, les Docteurs *in cap. à nobis de iure patron. & in cap. dilecta. de excess. prelatorum*, dient que les marques d'un Prieuré conuentuel sont, vn Cloistre, vn Timbre ou Cloche pour cennouer les Religieux, vn lieu pour tenir le Chapitre, vn Seau pour sceller les actes capitulaires, vn Refectoir, vn Dortoir, Chaires en Chœur, il n'y a rien de tout cela audit Prieuré, lequel par ce moyen ne peut estre conuentuel.

OUTRE ce que dessus, il faut qu'il y ait nombre de Religieux qui facent vn corps & college, car la pluralité ne suffiroit si ce n'estoit *en corps*, suyuant la significatiō du mot corps Conuent ou College *per glo. in extrauaganti, suscepti regiminis in verb. in Ecclesiis. ne sede vacante*, ou elle dit que ce n'est pas assez que plusieurs Religieux y soient : ains fault que ce soit vn corps & College.

Sacristain m-
prouue la communauté.

DONT sensuit que vn Secrestain s'il y en a vn ne fait vn Conuent, ny le nōbre des trois ou quatre Religieux enuoyez audit Prieuré pour tenir compagnie au Prieur, & faire le seruice diuin, ce que quelque fois les anciens Abbez faisoient quant les Prieurez estoient tenuz par leurs Religieux, ce que aujourd'huy ils ne font, si le Prieur est seculier & cōmādaire.

ITEM le dernier titulaire & possesseur dudit Prieuré en fut pourueu en court de Rome comme estant conuentuel par aduenture, & non cōme estant purement & simplement conuentuel, & cōbien que le mot forsan soit vne dictiō qui se prêt quelque fois pour vne affirmatiue, toutesfois sans entrer en dispute pour ce regard, il appert par la Bulle de prouision que ce mot forsa est vne dictiō dubitatiue & nō affirmatiue.

CAR il est commandé par ladite prouision au pourueu dudit Prieuré, de se mettre *in sacris ordinibus*, & de faire le sermēt de fidelité au cas que ledit Prieuré soit conuentuel, voyla cōment il appert qu'il n'est pas arresté que ledit Prieuré soit cōuentuel, aussi n'a ledit dernier titulaire prins les ordres ny fait le serment de fidelité.

PLUS il appert que ledit dernier titulaire en a iouy comme d'un Prieuré simple en nourrissant vn seul Chapellain pour y faire le seruice diuin.

Et encore appert par la prinse de possession dudit dernier titulaire qu'il a prins ladicte possession cōme estant vn prieuré simple.

CAR l'ordonnance publiée l'an cinq cens cinquante, article 13. dit que pour prendre possession d'un Euesche, d'une Abbaye, ou d'un Prieuré conuentuel, il faut la prendre en la presence de ceux qui sont du corps & conuent, par lesquelz il est receu, & s'appelle telle possessiō vne receptiō, laquelle doit estre signée par le Greffier ou scribe du Chapitre ou du Conuent, sans que autre Notaire la puisse recepuoir.

*Prise de possession aux
seuls conuents, &
sans ceux qui font
le corps.*

CE que n'a esté fait par le dernier titulaire, lequel a prins possession en la presence de deux tesmoins, & d'un simple Notaire sans y auoir appelé ny couuoqué Religieux aucun, pource qu'il n'en y a que vn seul qui desert ledit Prieuré, auquel le fermier paye pension suyuant son bail.

PARTIE aduerse dit au contraire que par plusieurs pieces par luy produictes, il appert que ledit Prieuré est appelé conuentuel, & qu'il est taxé aux decimes, ce sont ses principaux moyens & fondemens.

ADVOY on fait responce que vn Prieuré n'est pas conuentuel pour estre appelé tel *in Verbis enunciativis* des pieces produictes au proces, pource que la nomination ne fait preueconcluante que la chose soit telle que on la nomme.

LE texte y est formel *in S. apud catonem inst. de adoptionibus*, conforme & semblable au texte *in cap. per Vestras. qui filij sint legitimi*, il ne sensuit que celuy soit mon filz ou celle la soit ma femme, que i'ay appelé & nommé souuent mon filz ou ma femme.

*Enuatiua non
probat.*

LA conuentualité se verifie, ou par la fondation d'icelle, ou par les marques ladictes & non par les pieces qui l'appellent conuentuel pource que ce sont Notaires ou clerchez qui ont fait lescdites pieces, esquelles il n'estoit question ny doubte si ledit Prieuré estoit simple ou conuentuel, par ainsi ladite nomination n'y fait rien comme Dece a tres-bien & amplement disputé en son conseil 510. ou il conclud que *sola nominatio non probat nece sario rem esse talem.*

Q V A N T aux Decimes partie aduerse ne produict pas vne
seule quittâce des Decimes payées *nomine conuentus*, ains pro-
duict vn extraict d'un registre du pretendu Receueur des de-
niers du Diocese de Sens qui ne fait foy aucune, car comme
il est, il appert qu'il est falsifié, & que c'est chose appostée, car
au registre de la chambre des Comtes contenant la taxe des
Decimes faite en l'an 1516. Il ne se trouue point que ledit
Prieuré & conuent soit taxé, ains le Prieur seulement.

A V S S I est il certain que les Prieurez conuentuelz ne sont
taxez à part, pource qu'ilz n'ont point de manse separée, cōme
ont quelques Abbez, de sorte que ledit extraict est notoire-
ment suspect, & ne peut faire foy, d'autant qu'il n'appert que
celuy qui la exhibé soit personne publique & n'est aussi signé
de personne publique.

P A R consequant n'est ledit registre si fort que les presom-
ptions & raisons cy dessus deduites, pour monstrier que le-
dit Prieuré est simple & non conuentuel.

O V T R E ce que dessus faut noter que partie aduerse a ex-
traict du Greffe des insinuations Ecclesiastiques vne copie de
la signature de la collation faite au dernier titulaire, laquelle
contient que ledit Prieuré est *forsan conuentualis*, mais on a
fait rayer le mot *forsan* comme il appert, de sorte que pour
ladite faulseté commise *in omittendo*, partie aduerse doibt estre
declarée descheue du droit par elle pretendu audit Prieuré
suyuant l'ordonnance.

S. le Prieur de morvan
—
son vray & simple conuentionnel